

四庫全書薈要

• 乾隆御覽本

集部

石湖詩集卷十

宋 范成大 撰

翰林學士何公

溥

輓詞

以下館  
中作

盛際羣多士諸儒遜一賢  
名場魁淡墨官簿到花磚  
地近行知政天高不假年  
書生稽古力何必盡台躔

送洪內翰使金二首

郊廟熙成霈率濱  
罪如猾夏亦維新  
邊烽已却來南騎

使節猶煩第一人遙想穹廬占漢月便呼重譯布唐春  
單于若問公家世說與麒麟畫老臣

峨冠方侍玉輿香

公比侍祠郊裡  
執綏備顧問

雙節飄然照大荒正

倚先生令趙重寧容驕子詫兵強天教忠信行區脫人  
許功名上太常試卜和羹知未晚歸來煙雨正梅黃

次韻趙德莊吏部休沐

窈窕新堂好委蛇夜直還遙知歌帽髮正奈捲簾山門  
外客姑去窓前人對閑誰能烏帽底塵土浣朱顏

次韻王夷仲正字同遊成氏園

秀巖堂上玉東西把酒登臨望眼迷  
天宇四垂粘地近海山一抹帶潮低  
絕知客好無塵事聊記吾曾有醉題  
倚賴羣仙聯姓字他年誰敢一丸泥

是日諸公  
令余題壁

王季海祕監再賦成園復次韻

雲莊風榭對東西清暑光陰近竹迷  
一斗正緣詩興盡兩眉休為客愁低  
披開豹霧尋陳迹埽盡蛛塵省舊題  
健往莫愁騎馬滑闌珊梅雨不成泥

春晚偶題

寂寥春事冷於秋雨打風吹斷送休點檢梨花成一夢  
蘸紅新綠滿枝頭

倪文舉奉常將歸東林出示綺川西溪二賦輒賦  
長句為謝且以贈行

綺川亭上凌雲賦人在回仙舊遊處誰教書劍走長安  
荻月霜楓等閑度朱門不炙釣竿手萬卷難供折腰具  
偶然把筯憶蓴羹乞得閑官徑呼渡江漲橋頭有渡船

船頭歷歷東林路雲煙如畫水如天  
笑憶紅塵問良苦  
我亦吳松一釣舟  
蟹舍漂搖幾風雨  
因君賦裏說江湖  
破帽蹇驢明亦去  
雞犬相聞望可見  
鷗鷺同盟心亦許  
相過得得歛溪門  
雪夜前村聽鳴榔

送吳智叔檢詳直中祕使閩

抗章襍被豈公難已說高風立懦頑  
客路莫嫌河畔草  
直廬須愛道家山  
秋生蓮浦船初泛  
春滿茶溪騎趣還  
却訪故人西府舊  
定煩書札墮田間

楊君居士挽詞

孝至蘭陔茂身修梓里恭名場兒中鵠  
嬋黨壻來龍駒隙驚年運蟬媽有慶鍾  
幽光定無憾豐刻妙形容

送周畏知司直歸上饒待次

漫郎西笑費三年故業新聞腹果然長  
塵劇談抽繭緒短檠細字綴蠶眠頻驚  
陸海風波夢未了京塵粥飯緣後日重  
來應訪舊五湖煙浪有漁船

次韻魏端仁感懷俳諧體

浪學騷人賦遠游大千何事不悠悠酒邊點檢顏紅在  
鏡裏端詳鬢雪羞過眼浮雲翻覆易曲肱短夢破除休  
孤煙落日冥鴻去心更冥鴻最上頭

次韻李子永梅村散策圖

光風先放越溪春蕭散尋詩索笑人藜杖前頭春浩蕩  
三生應是主林神

太師陳文恭公挽詞

日者更皇化公來輔聖能無心殊轍混不作衆波澄舉



國材真相他年了中興天如遺一老人亦望三登  
候火朝連夕籌帷決縱擒一江遮敵障千古靖邊侵  
日黃河誓浮雲綠野心身名兩無憾天壤獨清音

聖父咨當璧元臣預斷金玉衡賓舜日黃屋遂堯心國  
定功無迹身閑病已深旌忠有謨訓碑榜照來今

趣召單車至驚傳兩鬢凋傾城迎國老即日走天驕夢  
已商人莫身猶漢相朝古來賢達意生滅兩消搖

送陳朋元赴潁陽

九畹滋蘭靜自芳  
啁啾誰復認孤凰  
風流歲晚嫌杯酒  
文字功深得鬢霜  
斂板君猶能俛仰  
倚樓吾敢計行藏  
船開便作江南客  
天色無情更鴈行

次韻韓無咎右司上巳泛湖

休沐辰良不待晴  
徑稱閒客此閒行  
春衫欺雨任教冷  
病眼得山元自明  
抹黛濃嵐圍坐晚  
揉藍新渌沒篙清  
棲鴉未到催歸去  
想被東風笑薄情

太保節使趙公挽詞

密

結髮險艱會捐軀跳盪功鬢凋猶陞戟心在惜弦弓劍履三槐次樓臺四壁中諸郎競文武不朽是清風

太宜人程氏挽詞

程泰之吏部之母

我昔官黔歛人傳女訓芳尊章宜小婦孫子壽高堂風木真無定冰魚已不嘗遙憐霜露感何必薤歌傷捧檄三牲養稱觴百歲期身猶孺子泣世已隙駒馳吉夢青衣卜豐碑黃絹辭佳城有奇事應足洗餘悲

與王夷仲檢討祀社

殘夜露如雨秋氣淒以分牆西雲正黑跼跼墮金盆良  
耜酢西成豆籩蓊芳芬去年歲大稔小家甌生塵疫鬼  
投其巖虐甚溺與焚皇慈降清問下招離散魂調糜鬻  
藥石黑簿回春溫德馨典神天秋稼如雲屯社公亦塞  
責醉此豐年樽神兮率舊職為國憂元元自今歲其有  
驅癘蒼煙根

王園官舍睡起

公退閉閣卧官居如淨坊屋角斷虹飲日西楊柳黃客

來來我帶客去書滿牀睡覺有忙事煮茶翻斷香

古風酬胡元之

以下白塔  
新居作

拂我膝上琴當客清風襟我琴無軫絃不和願借之于  
調其音美人一笑千黃金彈作江岸花木深下有同隊  
之游魚上有同聲之鳴禽琴聲一疊一歎息江花江草  
無終極

題徑山凌霄菴

峰頭非塵寰一舍誰所爰軒眉玉霄近按指沙界豁萬

山紛累塊衆水眇聚沫來雲觸石迴去鳥墮煙沒向無  
超俗緣茲路詎可越偕行木上坐同我證解脫

徑山傾蓋亭

萬杉離立翠雲幢娟娟稀聞晚吹香山下行人塵撲面  
誰知世界有清涼

題徑山寺樓

浴日蒼茫水捫星縹緲樓神光來燭夜壽木不知秋海  
內五峰秀天涯雙徑遊愛山吾欲住衰疾懶乘流

丙戌閏七月九日與王必大登姑蘇臺招王浚明  
陳淵叔耿時舉避暑次時舉韻

始賀火流西還嗟斗斜閨餘暑猶強顏新涼頗難進燥  
剛渴欲坼焦卷禿如燼炎官扶日轂輝赫不停運登臨  
有高臺勇往得三俊仍將王郎子飛步凌劫仞風從噫  
氣來雲作壞山陣鄉如垂頭魚忽已蟄蟲振空明晚逾  
清更要孤月印書生乃易與俛仰更喜愠憑闌天為高  
舉酒山欲近奇書鐵鉤鎖麗句錦窠暈茲遊我輩獨難

挽軟紅韉君看籠中鳥寧識咸池韻

淵叔出米元章書蹟甚奇

明日夜雨陡涼復次前韻呈時舉

幽懷青松獨直道黃楊閏懶從褫襪子遮日干主進閉  
戶友千載脫簡理秦燼秋熱出意表誰云法天運摧頽  
如鍛翮何暇賈餘俊願從青溪仙飛下二千仞撇波嘯  
長風塵暑陷其陣茲行病未能喝卧何時振一雨忽破  
慳江湖發封印天公如仲尼亦念季路愠團扇未全疎  
短檠差可近細字讀蠶眠揩眼眩燈暈明當呼我友乘



涼蹤游輒賡詩代僕吟非敢翫強韻

七月二日上沙夜泛

困倚船窓看斗斜  
起來風露滿天涯  
亭亭宿鷺明菰葉  
閃閃涼螢入稻花  
月下片雲應夜雨  
山根炬火忽人家  
江湖處處無窮景  
半世紅塵老歲華

浴罷

西城落日半輪明  
浴罷衣裳一倍輕  
玉宇風來歸鳥急  
火雲銷盡綠雲生

寄溧陽陳朋元明府約秋末過之

海內交情兩斷金，一官分袂阻登臨。  
書來恰值看雲眼，夢往誰知共月心。  
道義只今無捷徑，溪山依舊有清音。  
西風滿棹蒲帆飽，秉燭相尋語夜深。

次韻耿時舉苦熱

赤日纔低又火雲，巷南街北斷知聞。  
荷風拂簟昭蘇我，竹月篩窓慰藉君。  
避暑無奇那避謗，能觴便了莫能文。  
浮湛放蕩從今始，悔把長裾強沐薰。

余家近穿小蓮池  
時舉亦種竹簷間

皆為度

暑計

次韻王浚明用時舉苦熱韻見贈

暑窓當午思昏昏雷起千峰睡不聞  
鑠石誰能招楚魄  
斲冰我欲訪湘君  
年華祇合加餐飯  
事業休工刺繡文  
賴有兩賢南北巷  
歲寒幽谷共蘭薰

李次山自畫兩圖其一泛舟湖山之下  
小女奴坐  
船頭吹笛其一跨驢渡小橋入深谷  
各題一絕

船頭月午坐忘歸  
不管風鬟露滿衣  
橫玉三聲湖起浪

前山應有鵲驚飛

黃塵車馬夢初闌  
杳杳騎驢紫翠間  
飽識千峰真面目  
當年拄笏漫看山

太傅楊和王挽歌詞二首

先廟垂忠烈  
孤童侈舊勲  
風雲天策府  
心膂殿前軍  
汴  
荆漸臺蹙胡驕  
蜀幕焚人亡  
汗青在足以詔無垠  
定遠之師

劉豫以廢石梁之後敵  
帳蕩然功無烈於此者

歲與靈光晚  
名登甲令芳  
剖符山若礪  
交戟鬚如霜  
半

世三槐位千秋異姓王哀榮公不憾人自惜堂堂

少卿直閣鄭公挽歌詞

恭老

今代魁梧老終身寂寞濱鬢霜三館直碑淚五州春壽  
相空壬甲行年竟已辰墳丘纔馬鬣何處著經綸

憶昨登門日驩傳考室詩謂公安且吉何意哭於斯遺  
老典刑盡此邦名教悲誰能傳耆舊他日慰吳兒

高景菴讀舊題有感

莓苔風雨舊詩留十七年前鬢未秋巖桂拂雲篁竹拱

樹猶如此一搔頭

華山道中

過午曾雲未肯開  
煖寒村店竹筵灰  
蕭蕭林響棠梨戰  
晚恐陽山有雨來

送嚴子文通判建康

四海論交賴有子  
一日不見真愁予  
人誰可與話心曲  
天忽遣來同里居  
懊惱春來不數面  
丁寧歲晚猶頻書  
黑頭屢別那敢惜  
歎息駸駸霜滿梳

次韻王浚明詠新居木犀

月窟移來有貴名一簾金碧照東榮  
鼻端入妙睡魔醒眼底會真詩句生  
日氣瓏璚無奈醉露華凌亂不勝清  
君家傾國何時見淡掃蛾眉撚夕陰

提刑察院王丈挽詞

彥光

諭蜀三年戍還吳萬里船雲歸雙節後  
雪白短檠前百世春秋傳一丘陽羨田  
浮生如此了何必更凌烟日者悲離索  
公今又眇冥門人辦韓集子舍得韋經  
此

去念築室空來聞過庭平生無路見終古泣松銘

送關壽卿校書出守簡州

東壁星宮館列仙一麾苦欲近田園宅家但寶千金鑑

臣輩何辭萬里船

壽卿述藝祖寶訓為書以獻多觴責要者

京洛知心塵鞅

裏江吳攜手暮帆邊聲名如此歸安往日日間門望眼穿

頃自吏部郎去國時獨同舍趙友益追路送詩數  
月友益得儀真過吳江次元韻招之



東風分袂省西廊袖有明珠照客航道義有情通出處  
文章無地著炎涼君今猶把一麾去我敢倦鋤三徑荒  
邂逅天涯如夢寐肯來相對話更長

長沙王墓在閭門外

孫伯符

英雄轉眼逐東流百戰工夫土一坏  
蕎麥茫茫花似雪牧童吹笛上高丘

次韻孫長文泊姑蘇館

讀書窓下一燈殘忽有詩來為煖寒  
聞道扁舟春共載

雪雲雖冷不相干

長文再作復次韻

渚蒲汀蓼得霜殘  
歸客思家不計寒  
喜鵲門前人一笑  
絕勝風色候長干

次韻耿時舉王直之夜坐

庭葉翻翻鬧燈花  
粟粟穠闌山千里  
鴈風雨滿城鐘隴  
上新登穀江頭舊  
熄烽今年吾計得  
安穩讀三冬

次韻徐子禮提舉鶯花亭

并序

秦少游水邊沙外之詞蓋在括蒼監征時所作予至  
郡徐子禮提舉按部來過勸予作小亭記少游舊事  
又取詞中語名之曰鶯花賦詩六絕而去明年亭成  
次韻寄之

灘長石出水鳴隄城郭西頭舊小溪游子斷魂招不得  
秋來春草更萋萋

愁邊逢酒却成憎衣帶寬來不自勝煙水蒼茫外沙路  
東風何處挂枯藤

壚下三年世路窮  
蟻封盤馬竟難工  
千山雖隔日邊夢  
猶到平陽池館中

文章光燄照金閨  
豈是遭逢乏聖時  
縱有百身那可贖  
琳琅空有萬篇垂

山碧叢叢四打圍  
煩將舊恨訪黃鸝  
纈林霜後黃鸝少  
須是愁紅萬點時

古藤陰下醉中休  
誰與低眉唱此愁  
團扇他年書好句  
平生知己識儋州

石湖詩集卷十

石湖詩集卷十一

宋 范成大 撰

己丑五月被召至行在遇周畏知司直和五年前

送周歸弋陽韻見贈復次韻荅之

以下自處州再至行在作

分袂悠悠爾許年莫嗔蓬鬢兩蕭然酒槽不奈青春老  
經筭空供白晝眠暗綠千章新活計軟紅三尺舊塵緣  
相逢且作西湖客山繞荷花樣畫船

次韻馬少伊郁舜舉寄示同游石湖詩卷七首

蕪城老蘚不知春，忽有柴門月色新。  
芝草琅玕無鎖鑰，自無超俗扣門人。

莫問朝歌與棘津，浮生惟有一杯春。  
君看百戰功名地，越戍吳臺兩窖塵。

鏡面波光倒碧峰，半湖雲錦萬芙蓉。  
去年蕩槳香風裏，行傍石橋花正濃。

紅皺黃團熟暑風，甘瓜削玉藕玲瓏。  
身謀已落園丁後，

滿帽京塵日正中

兩賢風度藹春陽  
步屨隨風上柳塘  
綵筆紅牋芳徑裏  
句中挾我萬花香

得得來題小隱詩  
拂花縈柳畫船移  
湖邊好景春猶未  
須到秋清月滿時

瀟洒王郎亦勝流  
今年何事阻清遊  
當家風味今如此

孤負山陰夜雪舟

王必大獨不赴  
二公同遊之約

玉堂寓直



摘文窓戶九霄中岸幘燒香愧老農上直馬歸催下鑰  
傳更人唱促鳴鐘金城巖嶂雲千雉碧瓦參差月萬重  
骨冷魂清都不夢玉階蕭瑟聽秋蛩

己丑中秋寓宿玉堂聞沈公雅大卿劉正夫戶部  
集張園賞月走筆寄之

笑看收雲捲雨忙沉沉宮樹納空光夜長來伴玉堂宿  
天近似聞丹桂香鵲樓欄浮瑞氣鳳凰城闕帶新涼  
遙知勝絕西園會也憶車公對舉觴

八月二十二日寓直玉堂雨後頓涼

雨意蒸雲暗夕陽濃薰滿院落花香題詩弄筆北窓下  
將此工夫報蒼涼

次韻荅吳江周縣尉飲垂虹見寄

垂虹亭上角巾傾  
鼉怒龍吟醉不聽  
安得對君浮大白  
想應嗤我汗新青  
夢魂舞蝶隨春草  
時節賓鴻點暮汀  
湖海扁舟須及健  
莫教明月照星星

次韻徐廷獻機宜送自釀石室酒三首

元亮折腰嘻已久故山應有欲蕪田因君辦作送酒客  
憶我北窓清晝眠

清絕仍香如橘露甘餘小苦似松肪官槽重濁那知此  
付與街頭白面郎

一語為君評石室三杯便可博涼州百年兀兀同渠住  
何處能生半點愁

玉堂寓直曉起書事記直舍老兵語

江湖垂釣手天漢摘文堂魂清不得眠室虛自生光曉

緯澹天闕江濤隱胡牀傳呼九門開奔走千官忙若若  
誇組綬紛紛夢黃梁微聞鈴下騶竊議馬上郎但計夢  
長短寧論已行藏

與長文正夫游北山

柳岸松門勝處通馬蹄踏霧入空濛春寒有力欺遊子  
天色無情沒斷鴻雨脚遠連山脚暗杏梢斜倚竹梢紅  
馳裘擁鼻吾衰矣年少猶嫌料峭風

致政承奉盧君挽詞二首

德華父

泮水橋門識太平歸來霜鬢老柴荆淹中學遽方成傳  
谷口名高豈待卿黃壤無情埋玉樹青衫有道勝金甌  
襄陽耆舊今蕭索惟有松風到晚清

純孝當年有護持赤眉那敢近姜詩眼看庭玉成名後  
身及堂堂未老時湖海青鞵驚斷夢風霜丹旆挂新悲  
尊前五客今誰在愁絕廬山十段奇

寓直玉堂拜賜御酒

歸鴉陸續隨宮槐簾幙參差晚不開小雨遂將秋色至

長風時送市聲來近瞻北斗璿璣次猶夢西山翠碧堆  
慚愧君恩來甲夜殿頭宣勸紫金杯

送汪仲嘉侍郎使金分韻得待字

聖人坐明堂洪覆等穹蓋歲頒兩玉節前後歌出塞公  
才有廊廟安用試專對要煩第一人鎮撫大荒外嫩寒  
欺別酒微月見征旆遙知燕山雪飄灑漢冠佩玉色照  
穹廬驕子亦心醉要領一笑得歸來安鼎鼐是時春正  
佳湖上花如海清遊不可遲日日樣船待

李翬知縣作亭西湖上余用東坡語名之曰飲綠  
遂為勝概

芷葺蓮巢喚客遊  
蘆鞭席帽為君留  
未論吹水堪添酒  
且要移牀學枕流  
乍霽却陰梅釀雨  
暫暄還冷麥催秋  
石湖也似西湖好  
煩向蒼煙問白鷗

草蟲扇

莫嫌絡緯股鳴悲  
解向寒牕促曉機  
海眼多花無藉在  
顛狂只待學于飛

送汪仲嘉待制奉祠歸四明分韻得論字

丹霄碧海眇高騫  
厭直承明却自論  
寶馬十年聽漏箭  
扁舟一雨看潮痕  
侍臣相憶松門遠  
歸客還憐菊徑存  
清潤要非山澤相  
又煩一札下雲根

魯如晦郎中挽詞二首

術業推游刃功名苦溯洄  
著鞭孤壯志籌算老奇才  
星省龐眉去雲山袖手來  
知公了時命何必誅餘哀  
自古歸來引于今遂隱篇  
碁燈熒夜觀歌板聒春船  
陳



迹空華似佳城露草邊寂寥難黍約望眼一潸然

初約鄰人至石湖

以下辛卯自西掖歸吳作

窈窕崎嶇學種園此生丘壑是前緣隔籬日上浮天水  
當戶山橫匝地煙春入葑田蘆綻筍雨傾沙岸竹垂鞭  
荒寒未辦招君醉且吸湖光當酒泉

社日獨坐

海棠雨後沁臙脂楊柳風前撚綠絲香篆結雲深院靜  
去年今日燕來時

與周子充侍郎同宿石湖

幽香馥蕙帳清夢安且吉蘿月墮蒼茫松風隱蕭瑟曉  
禽啄且鳴喚我起盥櫛釣窓納雲濤灩灩浴初日金鉦  
忽騰上倒景落書帙佳晴有新課矚種催菽秫從今不  
得閒東臯草過膝

和周子充侍郎見寄樂府戲贈之作

釣海風水急登樓塵霧高不如岸綸巾春船攜小橋芳  
草含奇薰光景上東壁桂林那辦此辦作安昌客

壬辰三月十八日石湖花下作

夜飲海棠月朝漱山茶露臞儒槁木形受用侈如許荆  
扉隔黃塵誰識花島路惟有瘦筇枝共飽園中趣林神  
釀餘春政爾美無度葱蘢千萬重芳意未渠暮風香薦  
秀色鼎俎謝腥腐雖無稻粱謀捫腹有餘飫

刈麥行

梅花開時我種麥桃李花飛麥叢碧多病經旬不出門  
東陂已作黃雲色腰鎌刈熟趁晴歸明朝雨來麥沾泥

犁田待雨插晚稻朝出移秧夜食麩

壬辰天中節赴平江錫燕因懷去年以侍臣攝事  
捧御盃殿上賦二小詩

去歲排場德壽宮薰風披拂酒鱗紅小臣供奉金龍醖  
親到虛皇玉座東

天中繖動玉輿來萬歲三聲徹九街想見牙牀當殿過  
舜裳雲委拜堯階

壬辰七月十六日侵晨真率會石湖路中書事

白葛烏紗稱老農  
溪南溪北水車風  
稻頭的皪粘朝露  
步入明珠翠網中

次韻施進之惠紫芝術

山精媒長生仙理信可詰  
梨棗本寓言杞菊亦凡質  
幽人愛臞儒藥鼎薦珍物  
絕粒謝煙火耘苗換肌骨  
摩挲菜蕪甌塵生不須拂

題醉道士圖

蜩鸚鵡任過前壺中  
春色瓮中天朝來兀兀三杯後

且作人間有漏仙

五雜組四首

并序

古樂府有五雜組及兩頭纖纖殆類酒令孔平仲最愛作此以為詩戲亦效之

五雜組同心結往復來當窓月不得已話離別  
五雜組流蘇縷往復來臨行語不得已上馬去  
五雜組回文機往復來錦梭飛不得已獨畫眉  
五雜組綵絲鍼往復來鳥投林不得已夢孤衾

兩頭纖纖二首

兩頭纖纖探官繭半白半黑鶴髦緣  
膈膈膊膊上帖箭  
磊磊落落落封侯面

兩頭纖纖小秤衡半白半黑月未明  
膈膈膊膊扣戶聲  
磊磊落落落金盤冰

再賦五雜組四首

五雜組綬若若往復來大車鐸不得已去丘壑  
五雜組侯門戟往復來道上檄不得已天涯客

五雜組漢旌旆往復來賓鴻字不得已餐氈使  
五雜組非煙雲往復來朝馬塵不得已嬰龍鱗

夜坐聽雨

四檐密密又疎疎聲到蒲團醉夢蘇恰似秋眠天竺寺  
東軒窗外聽跳珠

寒夜獨步中庭

忍寒索句踏霜行刮面風來鬚結冰倦僕觸屏呼不應  
梅花影下一窓燈



會散夜步

忘却下樓扶我誰接離顛倒酒沾衣貪看雪樣滿街月

不上籃輿步砌歸

步砌吳語也

孟嶠之家姬乞題扇二首

輕雲翠英

輕煙小雨釀芳春草色連天綠似裙斜日滿樓人獨望  
斷鴻飛入萬重雲

翠袖凌寒弄月明梅花影下醉三更一天風露誰驚覺  
寂寞空杯綴落英

周畏知司直得湖南帥屬過吳門復用己丑年倡  
和韻贈別

邂逅婆婆失少年劇談抵掌尚超然君猶挂笏看山去  
我且披蓑聽雨眠京洛分襟疑後會江吳把酒悟前緣  
暫來忽去都如夢疑是陳卿竹葉船

偶書

以下十五首三十年前所作續得殘藁附此卷末

伯勞東去燕西飛同寄春風二月時可恨同時不同調  
此情那得更相知

雙燕

底處飛雙燕銜泥上藥欄莫教驚得去留取隔簾看

戲題牡丹

主人細意惜芳春寶帳籠堦護紫雲風日等閒猶不到  
外邊蜂蝶莫紛紛

春日三首

藥欄花煖小鴝眠雪白晴雲水碧天煮酒青梅寒食過  
夕陽庭院鎖鞦韆

西窓一雨又斜暉睡起薰籠換夾衣莫放珠簾遮洞戶  
從教燕子作雙飛

雙鯉無書直萬金畫橋新綠一篙深青蘋白芷皆愁思  
不獨江楓動客心

高樓曲

以下六首皆  
夢境所得

歲暮天涯客黃昏蝙蝠飛高樓人不到小雨怯單衣  
湘江怨

蘋芷迷煙路蓮舟忘却歸夜寒江水黑風雨夢如飛

採蓮三首

溪頭風迅怯單衣  
兩槳凌波去似飛  
折得蘋花雙葉子  
綠鬟撩亂帶香歸

藕花深處好徘徊  
不奈華筵苦見催  
記取南涇交葉露  
月明風熟更重來

柔櫓無聲坐釣魚  
浪花飛點翠羅裾  
空江日暮無來客  
腸斷三湘一紙書

弔陳叔寶詞

賞心亭上再來遊  
煙月迷人獨自愁  
行到江邊無去路  
却隨潮水過揚州

石湖詩集卷十一

石湖詩集卷十二

宋 范成大 撰

渡淮

八月十一日渡盱眙  
遇泗州順風如飛

船旗袞袞徑長淮  
汴口人看撥不開  
昨夜南風浪如屋  
果然雙節下天來

汴河

汴自泗州以北皆涸  
草木生之土人云本朝  
恢復駕回即河須復開

指顧枯河五十年  
龍舟早晚定疏川  
還京却要東南運



酸棗棠梨莫蓊然

虞姬墓

在虹縣下馬鋪北三十七里

劉項家人總可憐  
英雄無策庇嬋娟  
戚姬葬處君知否  
不及虞兮有墓田

宿州

五更出城  
鬼火滿野

狐鳴鬼嘯夜茫茫  
元是官軍舊戰場  
土伯不能藏碧磷  
三三兩兩照前岡

雷萬春墓

在南京城南環以小牆  
榜曰忠勇雷公之墓

九隕元身不隕名言言千載氣如生欲知曠世猶相感  
過墓人皆下馬行

雙廟

在南京北門外張巡許遠廟也  
世稱雙廟南京人呼為雙王廟

平地孤城寇若林兩公猶解障妖祲大梁襟帶洪河險  
誰遣神州陸地沉

睢水

睢口石門已隕河亦塞  
即項羽大敗漢兵處

一戰填河擁漢屯拔山意氣已鯨吞直南即是陰陵路  
兵果難將勝負論

伊尹墓

在空桑北一里有碑垠刻云湯相伊公之墓相傳墓左右生棘皆直如矢

三尺黃墟直棘邊此心終古享皇天汲書猥述流傳妄

剖擊嗟無咎單篇

留侯廟

在陳留縣中寨王原叔諸家攷子房所封乃彭城留城非陳留也自宋武下教修從

時其失  
久矣

功成輕舉信良謀心與鷁夷共一舟呂媼區區無鳥喙  
先生輕負赤松遊

西瓜園

味淡而多液本燕北種今河南皆種之

碧蔓凌霜卧軟沙年來處處食西瓜  
形模濩落淡如水未可蒲萄苜蓿誇

宜春苑

在舊宋門外  
俗名東御園

狐塚獲蹊滿路隅行人猶作御園呼  
連昌尚有花臨砌腸斷宜春寸草無

京城

倚天櫺櫺萬樓棚聖代規模若化成  
如許金湯尚資盜古來李勣勝長城

護龍河

在新宋門外中有網船數十艘

新郭門前見客舟清漣淺淺抱城樓六龍行在東南國  
河若能神合斷流

福勝閣

曹太皇所建奇崛冠京城中

翬飛五級半空翔指點樓欄說太皇劫火不能侵願力  
歸然獨似漢靈光

相國寺

寺榜猶祐陵御書寺中雜貨皆北人所需而已

傾檐缺吻護奎文金碧浮圖暗古塵聞說今朝恰開寺

珍裘一一起時新

州橋

南望朱雀門北望宣德樓皆舊御路也

州橋南北是天涯父老年年等駕迴  
忍淚失聲詢使者幾時真有六軍來

宣德樓

金加崇寧偽改曰承天門

曉闕叢霄舊玉京御園剩有暮鴉鳴  
他年若作清宮使願挽天河一水清

市街

京師諸市皆荒索僅有人居

梳行訛雜馬行殘藥市蕭騷土市寒惆悵軟紅佳麗地  
黃沙如雨撲征鞍

金水河

在舊封丘門外河中  
多大石皆良鐵所積

菜市橋西一水環宮牆依舊俯清灣誰憐磊磊河中石  
曾上君王萬歲山

壺春堂

徽廟稱道君時所居在撝芳  
園中俗呼為八滴水閣者

松漠丹成去不歸龍髯無復有攀時芳園留得觚稜在  
長與都人作淚垂

漸水

黃河將決其地則伏流先出名曰漸水河身日徙而南過封丘至胙城界中已有漸水去

汴京大約五十里耳

黃流日夜向南風道出封丘處處逢紫蓋黃旗在湖海  
故應河伯欲朝宗

李固渡

洪河萬里界中州倒捲銀潢聒地流  
列弩燔梁那可渡  
向來天數亦人謀

天成橋

碑石蔡京書在濬州岡上驛中東無下舊浮橋在此今河徙南行矣



一岡邑屋舊河灘却望河身百里間湧土漲沙漫白道  
天成橋石在高山

舊滑州

在洛州側積水中為河所淪久矣  
大伾即黎陽山西望積水不遠

大伾山麓馬徘徊積水中間舊滑臺漁子不知興廢事  
清晨吹笛棹船來

扁鵲墓

在湯陰伏道路傍相傳墓上土可  
療病禱而求之或得小圓如丹藥

活人絕技古今無名下從教世俗趨墳土尚堪充藥餌  
莫嗔醫者例多盧

美里城

在美河上  
四垣儼然

陵谷遷移尚故墟  
天盈商罪未燭除  
古今行客同嗤罵  
何止三篇泰誓書

文王廟

在美里城南

堂堂十亂欲興周  
肯使君王死作囚  
巧笑入宮天亦笑  
可憐元不費深謀

相州

推車老人自言吾州韓魏  
公鄉里南北兩墳尚無恙

禿巾髻髻老扶車  
茹痛含辛病眼花  
賴有鄉人聊刷恥

魏公元是魯東家

秦樓

在相州寺中上有貴人幕而觀使客云是郡主太守之妻也大抵相臺傾城出觀異於他

州

欄街看幕似春遊  
斑駁雕車碧畫油  
太守家人稱貴主  
縷金長袖倚秦樓

翠樓

在秦樓之北樓上下皆飲酒者

連袵成帷迓漢官  
翠樓沽酒滿城歡  
白頭翁媼相扶拜  
垂老從今幾度看

講武城

在漳河上曹操所築周遭十數里鑿城為道而過

阿瞞虓武蓋劉孫千古還將鬼蜮論縱有周遭遺堞在不如魚復陣圖尊

七十二塚

在講武城外曹操疑塚也森然彌望北人比常增封之

一棺何用塚如林誰復如公負此心聞說新來為封土世間隨事有知音

趙故城

在邯鄲縣南延表數十里

金石笙簧絕代無鼙鼓藜藿正乘除園翁但愛城泥煖

侵早鋤霜種晚蔬

邯鄲道

即昔人作黃梁夢處

薄曉霜侵使者車  
邯鄲阪峻且徐驅  
困來也作黃梁夢  
不夢封侯夢石湖

蘭相如墓

在邯鄲縣南趙故城之西

玉節經行敵障深  
馬頭醲酒奠疎林  
茲行壁重身如葉  
天日應臨慕蘭心

邯鄲驛

驛後有礪犬祭天者大抵盡為北俗漢戚夫人縣人也

長安大道走邯鄲倚瑟佳人悵望間  
高廟南陵荆棘裏漢宮何用憶關山

叢臺

在邯鄲北門外

憑高閱士劍如林故國風流變古今  
袿服雲仍猶似昔叢臺休恨綠蕪深

臨洺鎮

去洺州三十里洺酒最佳  
伴使以數壺及新兔見餉

竟日霜寒暮解圍融融桑柘染斜暉  
北人爭勸臨洺酒云有棚頭得兔歸

邢臺驛

信德府驛也去太行最近城外有荷塘柳隄頗清麗不類河朔

太行東麓照邢州萬疊煙螺紫翠浮誰解登臨管風物

枯荷老柳替人愁

柳公亭

在邢州城北小園中伴使邀客入遊云舊有流杯今廢園正對太行馬鞍一峰極奇

萃

主人敬客有餘情催喚繩牀坐柳亭曲水流觴非故物  
馬鞍山色舊青青

內丘梨園

內丘爲梨爲天下第一初熟收藏十月出汙後方佳園戶云梨至易種一接便

生可支數十年吾家園  
者猶望宋太平時所接

汗後驚梨真似冰花身耐久老猶榮園翁指似還三嘆  
曾共翁身見太平

大寧河

在內丘北河之東皆  
梨秦園二果正熟

梨棗從來數內丘大寧河畔果園稠荆箱擾擾攔街賣

紅皺黃團滿店頭

北人謂道上  
聚落為店頭

柏鄉

唐志堯山乃古柏仁俗  
傳或以此柏鄉為柏人

貫生名歷漢公卿自古逢讎不反兵仇敵滔天無敢動



柏鄉空濶迫人名

唐山

即堯山金主之父名宗堯  
改山名山下有放勳廟

勳唐遺德照清灣百聖聞風不敢班堯本帝名今始避  
此山應喚作唐山

光武廟

在柏鄉北兩壁有二十八將像廟前有二  
石人皆自腰而斷俗傳光武夜過以刀生

人間途不應  
劍斬之云

雲臺列像拱真人野老猶誇建武春不用劍鋒能削石  
冰河一瞥已通神

趙州石橋

在城南洺河上以鐵筍卯貫石堪筵不類人工

石色如霜鐵色新  
洺河南北尚通津  
不因再度皇華使  
誰洗單車瘦馬塵

柏林院

即東院趙州禪師道場在城中

朝來猶現劫灰深  
風鼓三灾海印沈  
急過當年無佛處  
庭前空有柏森森

樂城

縣極單單伴使怒頓餐不精欲榜縣令跪告移時方免

頽垣破屋古城邊  
客傳蕭寒爨不煙  
明府牙緋危受杖

樂城風物一淒然

呼沱河

即光武渡冰處  
在真定南五里

聞道河神解造冰曾扶陽九見中興如今一望寒煙暝  
不似滄浪可濯纓

真定舞

邊樂悉變中華惟真定有京  
師舊樂工尚舞高平曲破

紫袖當棚雪鬢凋曾隨廣樂奏雲韶老來未忍看婆舞  
猶倚黃鐘索六么

東坡祠堂

在中山府學  
學在化原坊

化原坊裏尚黌堂聞道蘇仙有奉嘗想見當年行樂處  
牙旗鐵馬照金章

松醪

中山酒猶名  
松醪然甚清

松風漱罷讀離騷翰墨仙翁百代豪一笑村翁那辦此  
當年嵇阮尚鋪糟

望都

縣人多癯婦人尤甚相傳縣東接唐縣病癯  
者甚衆比縣蓋染其風土縣西有小異曰由

山

荒寺疎鐘解客鞍由山東畔白煙寒望都風土連唐縣

翁媼排門帶癯瘠

安肅軍

舊梁門三城今惟一城  
有人煙澹澹皆涸矣

從古銅門控朔方  
南城煙火北城荒  
臺家抵死爭澹灤  
滿眼秋蕪襯夕陽

出塞路

安肅北門外大道  
容數車方軌

當年玉帛聘遼陽  
出塞曾歌此路長  
漢節重尋舊車轍  
插天猶有萬垂楊

白溝

在安肅北十五里間  
繞文餘古亦名巨馬河  
本朝與遼人分界處

高陵深谷變遷中  
佛劫仙塵事事空  
一水涓流獨如帶  
天應留作漢提封

太行

波河即與太行俱北至燕猶未斷大抵東至薊門北至塞北西接冀界也若晴日無埃則

出京至封丘已望見之矣

西北浮雲捲暮秋  
太行南麓照封丘  
橫峰側嶺知多少  
行到燕山翠未休

固城

自白溝十五里至固城鎮舊遼界也水味極惡用柳作大椀汲井謂之涼罐

柳椀涼罐汲泉遙  
味苦仍鹹似海潮  
却憶徑山龍井水

一杯洗眼洞層霄

范陽驛

涿州驛牆外有尼寺二鐵塔夾塗如雪俯瞰驛中

郵亭偏仄但宜冬  
恰似披裘坐土空  
枕上驚回丹闕夢  
屋頭白塔滿鈴風

定興

舊黃村金新建為縣井邑未成

新城遷次少人煙  
桑柘中間井徑寒  
亦有染人來賣纈  
淡紅深碧挂長竿

清遠店

定興縣中客邸前有婢兩頗刺逃走二字云是主家私自黥涅雖赦之不禁

女僮流汗逐氈輶云在淮鄉有父兄屠婢殺奴官不問

大書黥面罰猶輕

琉璃河

又名劉李河在涿州北三十里極清洌茂林環之尤多鴛鴦千百為羣

煙林蔥蒨帶回塘橋眼驚人失眠鄉健起褰帷指病眼

琉璃河上看鴛鴦

此河大中祥符間路振來輶錄亦謂琉璃河惟嘉祐中宋敏求入番錄乃

謂之六里河大抵土語難得其真

灰洞

在涿北燕南之間兩旁皆高岡無風而路極狹塵土空積咫尺不辨人物

塞北風沙漲帽檐路經灰洞十分添據鞍莫問塵多少



馬耳冥濛不見尖

良鄉

燕山屬邑驛中供金粟梨天生子皆珍果又有易州栗甚小而甘

新寒凍指似排籤村酒雖酸未可嫌紫爛山梨紅皺棗  
總輸易栗十分甜

盧溝

去燕山三十五里金以活鴈餉客積數十隻至此放之河中金法五百里內禁採捕故也

草草魚梁枕水低忽忽小駐濯漣漪河邊服匿多生口

長記輶車放鴈時

此河宋敏求謂之蘆菰即桑乾河也今呼盧溝

燕賓館

燕山城外館也至是適以重陽金重此節以其日祭天伴使把菊酌酒相勸西望詣

山皆鵲云初  
六日大雪

九日朝天誇典禮也將佳節勸杯盤  
苦寒不似東籬下雪滿西山把菊看

橙網

燕城外遇數車載新橙云  
修貢種之汴京擷芳園也

堯舜方堪橘柚包後人亦復使民勞  
華清荔子沾恩幸一騎回時萬騎騷

接送伴田彥皋

重譯知書自貴珍燕山何幸得斯人  
不須徐庾稱才子

一片寒陵石有神

耶律侍郎

兵部侍郎耶律實館伴使也不識字如提刑運使等字亦指以問

乍見文書頻指問  
低頭慚愧紫荷囊  
人間無事無奇對  
伏獵今成兩侍郎

龍津橋

在燕山宣陽門外以玉石為之引西山水灌其下

燕石扶欄玉作堆  
柳塘南北抱城迴  
西山剩放龍津水  
留待官軍飲馬來

燕宮

宏侈過汴京  
煬王亮所作

金盆濯足段文昌乞索家風飽便忘他日楚人能一炬  
又從焦土說阿房

會同館

燕山客館也授館之明日  
守吏微言有議留使人者

萬里孤臣致命秋此身何止一漚浮提攜漢節同生死  
休問羝羊解乳不

遑人館本朝使  
已謂之會同館

石湖詩集卷十二


謹案卷九第七頁前二行沙際春風捲物華按宋詩捲作轉與此異

卷十第六頁前八行官居如淨坊按宋詩坊作舫與此異

卷十一第一頁後一行郁舜舉按宋詩舜舉作寂舉與此異

卷十二第七頁前八行金石笙簧絕代無刊本簧訛笙據宋詩改





總校官庶吉士臣侍朝

校對官編修臣閔懋大

謄錄監生臣宋維翰



欽定四庫全書薈要

集部

石湖詩集卷十

三五

詳校官助教臣謝登雋



石湖詩集卷十三

宋 范成大 撰

與吳興薛士隆使君遊弁山石林先生故居

此卷乾道

壬辰冬赴廣西道中  
所作舊名南征小集

白蘋有嘉招蒼弁得勝踐會心不憚遠乘興恐失便籃  
輿犯窮臘共作忍寒面溟濛雲釀雪浩蕩風落鴈松篁  
漸清幽猿鶴或悲怨英英文章公作舍鎖葱蒨峽峰俯

前榮佳木秀諸院窮搜發山骨林立侍談讌西巖踞熊  
虎東巖峙屏案履綦故彷彿蓋瓦已零亂經營三十年  
成毀一飛電摩挲土花碧小立為三歎

自石林回過小玲瓏巖竇益奇昔為富人吳氏所  
有今一子尚幼山檢校於官

一丘乃中虛洞穴四無礙却略巖岫杳黝糾石狀怪蒼  
牛飲前池碧潄灩微瀨雕鏤具百巧圖畫窘千態哀湍  
寫壞磴凍雨濕空翠疎梅照草棘瘦竹拔蹊隧當時間

閻子目力在塵外孤童藐難料奇事疑有待誰歟千金  
捐來換把茅蓋不仙亦足豪衆垤皆累塊我評北山遊  
勝絕此無對玲瓏詎可小孰能為之大

濯纓亭在吳興南門外

淒風急雨脫然晴當道橫山似見迎野水茫茫何用許  
欄供遊子濯塵纓

乾道己丑守括被召再過釣臺自和十年前小詩  
刻之柱間後五年自西掖帥桂林癸巳元日雪晴

復過之再用舊韻三絕

浮生渺渺但飛埃  
問訊星宮又獨來  
天上人間最高處  
為君題作鬱蕭臺

拙疎何計補涓埃  
慚愧雙旌去復來  
三過溪門今老矣  
病無脚力更登臺

界天山雪淨黃埃  
溪上扁舟夜汎來  
匝地東風勸椒酒  
山頭今日是春臺

玉山道中

常山多清溪玉山富喬木行色鬱蒼然頗亦慰愁目  
梅花隔離見瓏璵照茅屋晚來風刮地想見飄香玉

桃花壇下望龜峰

石壇無土謾嶽岑何自能生小栢林擬擘蛤蜊龜殼上  
病來不殺嬾登臨

清音堂與趙德莊太常小飲在餘干琵琶洲傍洲  
以形似得名

曲浦彎環繞縣青一盃閒客兩飄零琵琶不語蒼煙暮

山水清音著意聽

過鄱陽湖次游子明韻

春工釀雪無端密大塊囊風不肯收  
休問巉巖與款側  
我今弔靡共波流  
野鷹兀兀平沙上  
折葦蕭蕭古渡頭  
滿眼荒寒底處所  
令人腸斷五湖舟

豫章南浦亭泊舟二首

繡檻臨滄渚  
牙檣插暮沙  
浦雲沉斷鴈  
江雨入昏鴉  
野曠天何近  
春寒歲未華  
來朝風一席  
隨處且浮家

閨歲花光晚霜朝草色荒趣墟猶市井收潦再耕桑客  
路東西懶江流日夜忙長歌情不盡一酌酌滄浪

清江道中橘園甚夥

芳林不斷清江曲倒影入江江水綠未論萬戶比封侯  
瓦屋人家衣食足暑風汎花蘭芷香秋日籬落明青黃  
客舟來遲佳景盡但見碧樹愁春霜

清江臺在臨江郡園西岡上張安國題榜

南來富壽岡形勝此蟠結岑坼戴高臺欄檻了風月蕭



灘曳長煙貝闕炯殘雪江流當帶橫練練浮木末天風  
來無鄉萬里吹醉顙登臨信奇事忍凍亦癡絕故人春  
夢覺遺墨秋蛇掣浮雲真可咤揮解酹空闊

自冬徂春道中多雨至臨江宜春之間特甚遂作  
苦語

客行無晴時淅淅如漏天東吳至西江舊歲接新年蠟  
屐驚踵決油衣笑鶉懸掀淖起復仆頃步如重關略似  
鴨與猪汨沒泥水關我塗未渠窮一晴愧天慳倒塔橋

已斷壁破渡無船路人相告語未到先長歎薄晚得磽确稍入袁州山不辭石齧足聊免泥沒韜自古行路吟聽者凋朱顏軒渠尚能賦詩人類癡頑

玉虛觀去宜春二十五里許君上升時飛白茅數葉以賜王長史王以宅為觀觀旁至今有仙茅極異常草備五味尤辛辣云久食可仙道士煮湯以設客

白雲堆裏白茅飛香味芳辛勝五芝揉葉煮泉摩腹去

全勝石髓畏風吹

入分宜

新喻渡無橋分宜橋有欄孰歟兩徼吏賢否已判然堂  
上著威信四郊如目前入國政可知茲焉略闕觀

方竹杖

竹君箇箇面團團此士剛方獨凜然外貌中心俱壁立  
任從癡子削教圓

游仰山謁小釋迦塔訪孚惠二王遺蹟贈長老混

融

堵田溪淵清洄洄梅洲問路寒雲堆連空磴道虬尾滑  
竹輿直上無梯階蒼官來迎夾道立相逢無言心眼開  
翠微中斷雪礪吼兩耳不辨供喧逐林間靜極成斷相  
政要萬壑號風雷山如蓮盆繞金地龍官避席餘蒼崖  
祖師抱膝坐古塔大禪海浪翻天來騰空狡獪我未暇  
拄杖踏濕撞莓苔問龍亦借一席地解包聽雨眠西齋  
當年公案忌錯舉神通佛法同坑埋混融菴中的的意

笑我舌本空崔巍茲事且置飽喫飯梯田米賤如黃埃  
大雨宿仰山翌旦驟霽混融云無乃開仰山之雲  
乎出山道中作此寄混融

誰開大仰雲此豈吾力及日光千丈毫彈指衆峰立衡  
山捲陰氣海市發冬蟄韓蘇兩枯魚出語自濡濕人厄  
與天窮底用苦封執但喜拄杖俊仍欣芒屨蒞向來三  
尺泥有足似羈馮龍淵古橋鉞獺徑寒溜泣

龍淵獺徑皆山

中往春淺山容瘦風餐澗聲急一簞寄前村野藪旋收迹

拾貓頭髻笄尖雀舌剥茶粒土毛冠江西斗酒況可挹  
聊同一笑粲緩賦百憂集

初入湖南醴陵界

崖樹陰陰夾暝途出山歡喜見平蕪一春客夢飽風雨  
行盡江南聞鷓鴣

醴陵驛

綠水橋通縣

縣前浮橋名

門前柳已黃人稀山木壽土瘦水

泉香乍脫泥中滑還嗟候子長檣洲何日到鼓柂上滄

浪

湘潭道中詠芳草

積雨倏然晴秀野若新沐芳草徑寸姿中有不勝綠  
萋萋路傍情頗亦念幽獨驅馬去不顧斷腸招隱曲

初見山花

三日晴泥尚沒鞞幾將風雨過年華湘東二月春纔到  
恰有山櫻一樹花

櫛洲道中

煙凝山如影雲塞日射毫桃間紅樹迴麥裏綠叢高客  
子歎游倦田家甘作勞乘除吾尚可未擬賦離騷

浮湘行

湘山中間湘水橫綠蘋葉齊春漲生盤渦沄沄去無聲  
吾乘桂舟汴中濡揚波擊汰雙櫓擗輓轡引竿如牛鳴  
篙師絕叫疊鼓轟潛魚跳奔乳猿驚煖煙浮空晝夢騰  
山長水遠天無情吹簫拊瑟弔湘靈水妃風御續來迎  
問客良苦遠征行昨者斧鉞下青冥命我盡護安南兵



嶺海一視如王庭布蕩陽春濯腐腥王事靡盬來有程  
匪躬之故惟爾眎芳洲杜若空青青九歌淒悲不可聽  
願賡楚調歸和平

湘江洲尾快風挂帆

船頭雪浪吼奔雷十丈高帆滿意開我自只憑忠信力  
風應不為世情來兒童屢惜峰巒過將士猶教鼓笛催  
明日祝融天柱去更煩先捲亂雲堆

泊湘江魚口灘

知時社燕語橫竿游子奔波自鮮歡  
趁客賣魚雙槳急  
隔林沽酒小旗寒  
瀟湘渾似日南落  
嶽麓已從天外看  
薄暮灘前收百丈  
卧聞三老報平安

謁南嶽

湘中固多山夾岸萬馬屯坡陀無敢高  
似遜喬嶽尊  
曉投望雲亭衆丘拱牆藩濃嵐忽飄蕩  
積翠浮雲端天柱  
已峻極祝融更高寒  
紫蓋鬱當中岡勢  
洶崩奔峙為赤  
帝峰下直宮墀  
垣角樓捧雙闕  
圓方模九閭炎符撫中

興南正實司天草木薰協氣山林奠神姦妥靈有備物  
龍卷驚旗軒走叅桂林伯與神俱南轅上謁禮亦宜為  
國憂元元心空禍福相古井寒無瀾杯琰不用擲但願  
歸田園相傳壁畫好拂拭塵埃昏弓刀立壯士劍珮班  
靈官後宮行樂處窈窕千雲鬟錦地舞月畫珠櫳侍春  
閑武氏筆已絕梗概猶清妍

後宮壁畫武洞清筆極禁  
繁富貴之趣紹興二十年

大後為兩所敗後人募  
舊蹟更畫猶有彷彿

旋車闔廟去頗厭山市喧勝果

招客遊徑排集賢關梵虔絢雜組

衛藏經皆錦絲竹  
簾覆之孟蜀時拾簾

乃其戶部侍郎彬所造

錫杖鏘古鏤

開山善果尊者所遺

避雨勝業閣

在嶽祠之

南晚晴留凭欄石廩映岫嶮望眼增孱顏上封眇孤絕

南臺半雲煙碧岫有靈藥朱陵巢洞仙

晚晴乃盡見諸峰

病倦

懶幽討山僧鑄我頑松樛唐季枝柏跼隨初根奇事不

勝紀重遊當細論

廟路三十里夾岸大松五季時馬氏所植勝業寺柏不見根偃於地出八

幹龍蟠占數畝世所未之見傳為隋時物

### 兩蟲

鷓鴣憂兄行不得杜宇勸客不如歸天涯羈思難繪畫

惟有兩蟲相發揮

衡陽道中二絕

桑下蕪菁晚高花出短籬  
茅簷少春事惟記浴蠶時  
黑殺鑽籬破花猪突戶開  
空山竹瓦屋猶有燕飛來

衡州石鼓書院

古磴浮滄渚新翬鎖碧蘿  
要津山獨立巨壑水同波  
俎豆彌文肅衣冠盛事多地  
靈鍾傑俊寧但拾儒科

合江亭

并序

合江亭即石鼓書院今為衡州學宮一峰特立踞兩  
水之會湘水自右蒸水自左俱至亭下合為一江而  
東有感而賦韓文公所謂淥淨不可唾者即此處今  
有淥淨閣

石鼓鬱嵯峨截然踞滄洲有如古盟主勤王會諸侯蒸  
湘伯叔國稟命會葵丘敢不承載書戮力朝宗周混為  
同軌去崩奔不敢留宜哉百谷王博大無與儔羶毳昔  
亂華車馬隔中州未聞齊晉勲包茅費誅求威文亦弘

規尚取童子羞安知千載後但泣新亭囚我題石鼓詩  
願言續春秋

沈家店道傍棣棠花

乍晴芳草競懷新誰種幽花隔路塵綠地縷金羅結帶  
為誰開放可憐春

邵陽口路麤惡積雨餘寧難行

平生春夢境俛仰撫八極湖南天盡頭夢亦未常識豈  
知多病身今乃著脚歷山泉澄不清崖土壘而赤坳堂

滑勝油累塊硬逾石貪夫一回顧壯士三歎息不知清  
淑氣果復曾鬱積我豈鄙夷之短咏聊一劇

馬鞍驛飯罷縱步

食飽倦輿馬散策步前岡意行踏芳草蕭艾翁生香春  
事甚寂寥山桃帶松篁游蜂入菜花此豈堪蜜房今年  
蠶出遲柘葉分寸長好晴纔數日歲事未渠央

黃羅嶺

薄遊每遠已茲行遂登危峻阪盪胸立恍若對鏡窺傳



呼半空響濛濛上煙霏木末見前驅可望不可追躋攀  
百千盤有頃身及之白雲亘攬擷但覺沾人衣高木傲  
燒痕蔥蘢茁新莢春禽斷不到惟有蜀魄啼謂非人所  
寰居然見鋤犁山農如木客上下翔以飛寧知有康莊  
生死安嶮巖室屋了無處恐尚槽巢栖安得拔汝出王  
路方清夷

衡永之間山路艱澁薄晚吏卒關云漸近祁陽路  
已平夷皆有津津之色

朝登赤土嶺暮入黃泥谷春江弄花月歸夢恍在目覺  
來行路難杜宇叫高木凹中泥沒踝凸處石齧足坐輿  
我尚病想見肩輿僕衡陽復祁陽可暫不可宿晚來出  
前岡路坦亭堠促將士走相賀喜色如膏沐人生本無  
悶逆境要先熟不從憂患來安識平為福夷塗不常遇  
歷險始知足

書浯溪中興碑後

并序

乾道癸巳春三月余自西掖出守桂林九日渡湘江

游浯溪摩挲中興石刻洎唐元和至今遊客所題竊  
謂四詩各有定體頌者美盛德之形容以其成功告  
於神明者也商周魯之遺篇可以概見今元子乃以  
魯史筆法婉辭含譏蓋之而章後來詞人復發明呈  
露之則夫磨崖之碑乃一罪案何頌之有竊以為未  
安題五十六字刻之石傍與來者共商略之此詩之  
出必有相詬病者謂不合題破次山碑此亦習俗固  
陋不能越拘孿之見耳余義正詞直不暇卹也

三頌遺音和者希  
丰容寧有刺譏辭  
絕憐元子春秋法  
都寓唐家清廟詩  
歌詠當諧琴搏拊  
策書自管壁瑕疵  
紛紛健筆剛題破  
從此磨崖不是碑

愚溪在零陵城對岸  
渡江即至溪甚狹  
一石澗耳  
盖衆山之水流出湘中

一水彎環羅帶闊  
千古零陵擅風月  
取名如許安得愚  
因病成妍却奇絕  
至今鏡淨不可唾  
猶恐先生遺翰墨  
澤及溪流不庇身  
付與後來商巧拙  
我欲扁舟窮石澗

春漲未生寒瀨咽紛紅駭綠四山空惟有風篁韻騷屑  
清溪東去客西征鈇鋤潭邊聊駐節何時隨汝下瀟湘  
歸路三千櫓伊軋

鈇鋤潭形似之斗也

宿清湘城外田家

驅馬力猶彊奏牀身始疲浮浮雲拂帳滴滴水鳴籬未  
熟燈前夢閒尋道上詩湘中多夜雨客枕最先知

宿深溪驛去廣右界只一程

北戶書頻到南雲鴈不飛試評騎馬路何似釣魚磯擊

析黃茅店篝燈白竹扉故園桑柘煖亦有稻梁肥

石湖詩集卷十三